

YEMES

Yemes nilel tayekelesiys silet towen; ilana, “Bweina bitasimounids Yeisuw Kelis waseg mo bitakanawes aygan. Bitasiwyoubus-vak tasiyas tasimavs. Kukin gog guyawaw bikayuses mayses tasiyas sitawwotet, wankuyeim Yowbad bimop asisinap kalbaleb. Avei-tut abads bigeg, bitakaptuleids, bitanitougs Yowbad waseg, mo bilabeids.”

Nakabsilamaw

1 ¹Kalin nuwag min-Yisleil yakamiy, amikum sinawatan akweiy, nukusikes ven babaw, ven kweitan kweitan wasigeis; gunalet neiw, kuvinis. Yey Yowbad natouwat, o daGuyaws Yeisuw Kelis natouwat yey, yagag Yemes.

Simounid son sinap

²Sigwey yakamiy, igaw bukulouvats mikabiyokon kweitan kweitan waseg, kadiloka kumwasaws silmanin.

³Yowbad inakaleiwag mawan. Kukin abamiy bigeg, kadiloka kusimounids beibwein waseg Yowbad mo bukwapatuls o bukutawtouns.

⁴Kadiloka bukwapatuleimiy beibwein, sinap bwein mo bukukwawes beikous. Nag aveiyag bikabwag wasigeis yakamiy, nag.

⁵Kal yak sinapun Yowbad nag kukwakin bwein, kadiloka kunitoug waseg Yowbad mo bisekeim, peinan singay tasiwayoub Yowbad. Mtowen nag bikaneim, nag.

⁶⁻⁸Kukin bukunitoug waseg Yowbad kadiloka bukunmis bwein. Kukin nag bukunamis bwein nag aveiyag bukuban, peinan nanoum akweiy. Kukin kal ivag nanon akweiy, ansinap mamagina kaysay wayol ikivakuv ee... mo bikawot beim wakawalaw mo beikous. DaGuyaws nakaleiwag bo mawan, nag aveiyag bisek taw towen, nag; peinan nanon babaw isisawl palatan palatan, nag aveiyag biban, nag.

Guyawaw o tasiyas tasimavs

⁹Kadiloka bwadads tasimav teitan bimwasaw peinan Yowbad biyamwen.

10-11 Täge kadilok tasiyas guyawaw bimwasaws peinan biyabus; mamagina awuyow lalan bikalayag, beikous. Peinan igaw beivag kalas avakaein, mo beiyag awuyow, lalan bikalkalouws, sikamnabwein beikous. E, guyawaw mawan, igaw biwwotets-wan, nuwanaw mo bintamats.

Dakabiyokons

12 Kal yak mukwabiyokon waseg bukusesun-wan kwaptuleim, mo bukumasaw kid. Yowbad bisekeim mulalan, mamagina mwamovam. Yakids tasiwyoubus Yowbad, anilivan moundid bo bisekeids mwamovads.

13 Igaw mukwabiyokon waseg, awoum bukulivan, “Yowbad isimkineig”; awoum. Nag kal bisimkin Yowbad sinap kalbaleb silmanin; o Yowbad nag bisimkineid sinap kalbaleb silmanin, nag.

14 Täge nanoud tatoneid bisimkineid, igaw mo biseiw nuwad sinap kalbaleb silmanin.

15 Kukin nanoud waseg sinap kalbaleb, sinap towen bivakaein; nakabiyokous waseg bikop natun, yagan kanig.

16 Sigwey bwanabwein yakamiy, awoum teitan bikatidavimiy.

17 Tamads walbalab ansinap kamnat, mtowen issiwyoubuds youd babaw bwanabwein o sinap babaw bwanabwein. Nag teitan gamag bisiwyoubuds bwanabwein, nag. Yowbad anmwānet tut babaw ansinap katanok-wan, bwanabwein, kamnat.

18 Anilivan moundid waseg bo ivageids, vāgan bitamugwas Yowbad inakabwabub waseg; peinan nanon bo mawan.

Kadiloka bitaliganes livānen Yeisuw

19-20 Sigwey bwanabwein yakamiy, kunages sinap towen. Nuwanaw kuliganes livan bwein, täge kadilok kuyouviys silmanin amilivan sona mikavikun. Ta-bukuwteles Yowbad nawotet mikavikun waseg, nag.

21 Kupiyaves geg sinap bikibik, son sinap babaw kalbaleb; kutams bwein waseg livānen Kelis. Livan towen mo beisiw waninoumiy, bikatinabwes kululuwamiy silmanin Yowbad.

22 Livan towen awoum bukuliganesa mav, mogo bukwatidavimiy tatineimiy. Kadiloka kukwanawes livan towen.

23-24 Kukin kal binganega mav, mtowen mamagina gamag kavel ikin magin gilās waseg. Ikin ikous, inoun, mo inumlev ankakin amawan. Tasiyas nuwanaw binumlaves kaleiwag bwein.

25 Täge kal yak bukukinbunik Yowbad nakaleiwag bwanabwein, waseg bilikuds mo taneis wamnat; o bukuvvalut waseg kaleiwag towen, mo bukumwasaw mukwawotet waseg. Kadiloka bukwanow livan towen; awoum kwatlutega mav, adok mo bukunumlev kid.

26 Kukin kal idok itapwālou ibwein, täge nuwanaw wadon, bo ikatidavina tonen; itapwālou mav.

²⁷Tapwəloul bwanabwein o kamnat silmanin Tamads Yowbad, mamagina bitalabes tasiyas gumakey o nakwabs, peinan abes igeg; o bitapiyaves ven watinow sinapun.

Awoum kuvnases teitan o kupiyaves son

2 ¹Sigwey yakamiy, daGuyaws Yeisuw Kelis ansinap kamnat. Magat bukusimounids waseg Yeisuw, awoum bukwasigumis gamag mwasanin, o kuvnases sisiy; awoum.

²⁻⁴Kukin gamag asteiy bimeis wasinagog, wamitapwəloul, teitan anakweim maynamnabwein, antuwetuw wanaman goul-wan; teitan gog tasimav, anakweim sigsagob, kukin bukuvnases towen anakweim maynamnabwein, o kulansa, “Kum, kusin wanakaew wəkəb,” o kukin bukudibakes towen tasimav, kulana, “Kun, kusin watinow,” adok peinan kwasigumis towen tasimav, kukwatukins gamag wasigeis; bo kalbaleb amisinap towen.

⁵Sigwey bwanabwein yakamiy kunages agulivan. Yowbad sivinan tasiyas tasimavs vagan bisimounids bwein waseg Yowbad. Anilivan mound bo isekes, peinan isiwayoubs waseg; igaw mo beisiws wanakabkaleiwag. E, tasiyas tasimavs isimounids waseg Yowbad mo beisiws wanakabkaleiwag.

⁶Tage nukuyagages tasiyas tasimavs. Asimwasin. Bo igak! Kalisiy tayakeikays wasigeis yakamiy? Kalisiy iyateleimiy? Adok tasiyas guyawaw mwasanin.

⁷O tasiyas mwasanin iyages yagan datoveks Yeisuw.

⁸Kukwakins datoveks nakaleiwag kweiboug, Bukitab waseg, mamagina,

“Kadiloka bukuvnas soum, māwana kuvnaseim tatoneim.”

Kukin bukwanawes livan towen beibwein, mo beibwein amisinap yakamiy.

⁹Kukin gog bukuvnases gamag mwasanin o bukwasigumis gamag mwasanin, bogo amisinap kalbaleb, peinan kusiplates Yowbad nakaleiwag.

¹⁰Kal yak bukuvnas Yowbad nakaleiwag babaw, tage sinap katanok waseg bukukwalouw, bo bigeg amsinap; mamagina youd babaw wasigeis bo nukukwalouw.

¹¹Tamads gog nilivan, “Awoum kusubwan,” nilivan-vak, “Awoum kuweiy gamag.” Anmwaneta Yowbad anilivan tasiyas. Magat bukuweiy gamag, tage nag kusubwan, bogo takalbaleb yakoum, peinan bo kusiplew Yowbad nakaleiwag.

¹²⁻¹³Kadiloka bukuvnases beibwein amilivan o amisinap. Yowbad nakaleiwag waseg bo ilikuds mo taneis wamnat. Igaw nakaleiwag towen waseg bo bikatkineids.

Kukin nag binok nuwam soum, Yowbad nag binok nuwan ya_koum. Tage binok nuwam soum, Yowbad mo binok nuwan ya_koum; nag bikam_tanim, nag.

Bitasimounid waseg Yeisuw kadiloka bitakanow aygan

¹⁴Sigwey yakamiy, kukin kal idoki bisimounid waseg Yeisuw, tage nag bikanow aygan, adok bo isimounid mav. Yeisuw nag bikatinob gamag towen.

¹⁵⁻¹⁶Kal yak bukunek tayakelesiy teitan o natan, anamoun isesuna, anakweim sigsagob, bukudibek kulana, “Amkweim kupwalum, bimuyumy woum; kam kukwam bukwamuweip, e mo kumwasaw,” tage nag kweitan kweim bukusek, o nag kweitan kan; adok bo kulivan mav ya_koum.

¹⁷Kukin bukusimounid, tage nag kwanow Yeisuw aygan, mo bukusimounid mav; magina simounid bo ikanig waseg ya_koum.

¹⁸Adok gamag teitan bidibakeim, bilana, “Ya_koum kusimounid waseg Yeisuw; yey gog akanow aygan.”

Kukin nag kweitan nawotet Yeisuw bukuwtel, amawan bukusimounid? Tage yey asimounid, mapuna bukukines Yeisuw nawotet nawtel.

¹⁹Adok kusimounids peinan Yowbad anmwagnet nises. Bwein! Tage simounid sinap towen waseg nag kadilok. Tasiyas baloum-vak isimounids, to ivag aspwayata singay.

²⁰Takabalawein yak, adok bakatimlakeim makava simounid nag bilabeim. Anagin nag. Tage simounid son wotet bo bilabeim.

²¹Kunuw tabuds Ebelam, ikanow Yowbad aygan; magina itam natun Aysak, isek Yowbad, nakabeilun waseg. Mapuna Yowbad idok tadidumwal towen.

²²Kuninuways Ebelam isimounid mo iwotet, o nawotet waseg takakin singay isimounid bwein.

²³Sinap towen mamagina,

“Ebelam isimounid Yowbad waseg, mapuna idok Ebelam tadidumwal.” Mapuna idokes veiyon Yowbad, mtowen Ebelam.

²⁴Taninuways igaw bitasimounids waseg Yeisuw, bitakawes nawotet mo Yowbad bidokeids tadidumwals ya_kids. Makava simounid nag bikadilok.

²⁵Nakubukwab nawen yagan Leyab kweiboug ansinap mawan, Yowbad idok nadidumwal peinan ileb Yosuw nagamag asteiy, ikidumwalus, mo itanouys bwein kweitan ked waseg.

²⁶Takakins geg kal won ta-ivag kululuwan, mounida takanig tonen. Mawana simounid, ta-ivag nawotet, mounida kanig.

Awn

3 ¹Sigwey yakamiy, awoum bukumlavags takatimlakay babaw yakamiy. Takatimlakay yakamey kukin sivinem bakakatimlakay,

o nag gog bakavag, Yowbad singay bimop sinap townen bo nakavag, o yakamiy-vak māwan.

²Tut townen tablabols yakids. Kukin kal nag beibol anilivan waseg, adok gamag townen singay bwein, peinan kadilok bikaluweg ansinap tonen.

³Tasenas tanmunum son vitulen wawudous mansiyas hos wasigeis. Man mansiyas kawkaveks mo takavaveis takidumwālus, bitouvins bineis ampalawen sivinads.

⁴O wag māwan, magat wag singay avakaein, o yag avakaein bitotow, tage kavaveis nag bivakaein, kakit; tage kadilok bitakavaveis, wag mo bisawl bein ampalawen sivinads.

⁵E, awads bo māwan, woun wuliyougwan kakit, townen awn, tage natawtoun singay-wan, bikaluweg youd babaw. Kov kakit kadiloka bivakanot bigob kay avakaein, beikous.

⁶Awn gog mamagina kov, silawun kalbaleb singay-wan, kadiloka biyagages woun wuliyougwan babaw, adsinaps babaw biyageg beikous, peinan Seitan ivakanot youd babaw awads waseg.

⁷⁻⁸Tawaw yakids kadilok bitakaleiwags wasigeis bulawud babaw, tasiyas wanawoud, tasiyas iyoyows wanakaew, tasiyas itatets wapwepway, o tasiyas wabwanit, e, bo takaleiwags wasigeis; tage nag kal kadilok bikaleiwag awan waseg, peinan kalbaleb singay-wan, mamagina pwatuw, kanig silmanin.

⁹Kunages sigwey yakamiy, awads waseg takavasis Tamads wanakaew, mogo tayages gamag tasiyas Yowbad nibunis, migis māwana townen.

¹⁰Awn katanok waseg isunap livan bwein son livan kalbaleb. Bo igak!

¹¹Tabta yuyeil sivanok beibwab yevagam son yol? Adok nag.

¹²Ta-māwan bukukil soup bwanabwein yuyeil yayan waseg, nag. Tabta yaveinun waseg bukulep oliv anagin? O bukulep anagin yaveinun kay yagan gleip waseg? Adok nag, peinan nag kweitan sinap māwan. Ta-māwan awn kalbaleb bilivan bwein.

Sinapun libalab

¹³Yakamiy tassinap o takatanaks yakamiy, awoum kwaypamwes sinap. Kadiloka kuwotets bwein. Gamag babaw mo bikakins amsinap bwein.

¹⁴Tage kukin bimouvit dabam, o bukwamliw soum, nag kadilok bukwaypom sinap, peinan tayyaweid yakoum.

¹⁵Sinap townen nag meinoy neim walbalab, nag; ven watinow sinapun, mamagina Seitan ansinap.

¹⁶Kukin bukwayapams o bukwameiliws, mo bukutavileiys bukulis bukumlavags bod babaw yakamiy, o sinap babaw kalbaleb bisap wasigeis yakamiy.

¹⁷Tage sinapun libalab bwanabwein waseg bitasiwayoub, bitakagmanum, bitakanow kaeig, bikalin nuwad sod, o bitaleb sod; nag bitayaweid o bitakatidavidav, nag.

¹⁸Kukin gog bitasiwayoub vagan beikous kameiliw; wotet to didumwal; anagin wotet towen igaw beiuw, yagan sinap didumwal.

Kalbaleb sinapun ven watinow

4 ¹Aveiyag wawun kukwammeiliws o kuvvatays simsimiyas wasigeis? Adok peinan amisinap yagan kayapam, to ivag ninoumiy babaw.

²Tamtimwamons yakamiy, kupwakitisa nag; mapuna kuweiyas gamag. Kunineivs, ta-mawan bukubanes, mapuna kukwammeiliws o kuvvatays. Bo igak! Nag kunitougs waseg Yowbad; mapuna nag bukubanes.

³Kukin bukunitougs, nag kubanes, peinan mikanitoug kalbaleb. Mikanitoug kalbaleb peinan amisinap kayapam.

⁴Takalbalebs yakamiy, adok kupiyaves datoveks Yowbad. Peinan kukwawes sinapun ven watinow, adok kupiyaves sinapun Yowbad. Kukin beivag sivinamiy ven watinow sinapun mo bukwamliwes Yowbad.

⁵Awoum kudokes makava livan towen kweiboug nilel mamagina, “Kululuwan, waseg towen Yowbad isen wanuwads singay ikalpwa¹kit wasigeis yakids.”

⁶Tage Yowbad singay ilabeids. Kweitan livan nises Bukitab waseg mamagina,

“Tasiyas takayapams Yowbad isilbwades; tage tasiyas tammanums Yowbad bisiwyoubus kid.”

⁷Kadiloka kutams Yowbad nakaleiwag waseg. E, kadiloka kupiyaves Seitan, mo bisawl.

⁸Takalbalebs yakamiy, kusineikimas Yowbad waseg, Yowbad mo biwekeimiy yakamiy. Kuwidis amisinap kalbaleb; beivag ninoumiy katanok, sinap kamnat silmanin.

⁹⁻¹⁰Kadiloka bigeg ninoumiy, peinan amisinap kalbaleb. Kuvvalams avakaein. Awoum kumwasaws o kugagigs, awoum. Bweina kummanums wamatan Yowbad, igaw mo bilabeimiy, biyamweneimiy.

Awoum kuvtokays livan

¹¹Sigwey, awoum kuvtokays livan simsimiyas wasigeis; awoum. Kal yak bukuvtok livan soum, o bukuyeg soum, mamagina kuyeg Yowbad nakaleiwag. Awoum. Kukin bukuyeg Yowbad nakaleiwag adok bo kupiyev kaleiwag towen, o bo bukulavag takaleiwag teitan yakoum. Awoum.

¹²Takaleiwag anmw¹anet-wan. Mtowen kadilok bikatinabweids o biyagageids. Makava gamag yakoum, awoum kuvtok livan soum.

Awoum kukwaypamwes sinap

¹³Kunages agulivan guyawaw yakamiy. Awoum kulivans, “Nagein o nubweig bakaywout bakan palatan, bakasesun katanoka bweilim, bakakow mavavag singay babaw, bakamey.” Awoum.

¹⁴Peinan nag kukwakins aveiyag bukulivatus nubweig, o asināvin bukukwanigs. Mwamovads gog mamagina wob, bisesun tut nag biveiyov, mo beikous.

¹⁵Kadiloka bukulivans, “Magat daGuyaws nanon māwan, bakasesuna mo bakawtel mawotet māwan māwan.”

¹⁶Nagein gog kukwaypamwes amisinap, mamagina tagagas yakamiy. Sinap towen kalbaleb.

¹⁷Kukin kal bikakin aw-wotet bwein tage bipiyev wotet towen, towen gog ansinap kalbaleb.

Guyawaw sinapun

5 ¹Kunages agulivan guyawaw yakamiy, kadiloka bukuvāams avakaen peinan mouvit singaya bukulivatus.

²⁻³Miwliyoug babaw bipsapwas; man bikaboulis amikweim; mimoney bipwapop peinan kwayuses; anpwapop bimlavag mamagina panous, biggob woumiy, nakabiyokous tut waseg, peinan singay babaw kwayuses.

⁴Mayses tasiyas tawteleins mibag bo kwayuses, igaw nises wamibunatum. Money towen iwkuwak. Aygan bo iligen Tatawtoun Yowbad; mapuna bikatimop amisinap kalbaleb nukuvvages.

⁵Nukumwasaws ven watinow waseg, nukukwamkwams mamagina misagal yam babaw waseg.

⁶Nukuyateles tasiyas toubweins mo nukuweiys. Nag ikatimapus amilivan. Makava nukuybilebes. E, Yowbad bikatimop amisinap guyawaw yakamiy.

Kukwapatuls o kuninitougs Yowbad waseg

⁷Sigwey, kadiloka kwaptuleimiy, kusesus-wan ee... igaw daGuyaws vayuwein bisap. E, kuninuways tabgubag ansinap, ikapatul, igaw kweis beikweis wuwal waseg, wankuyeim bulbweilim beikweis kweis, mo bitayoy kan singay avakaen.

⁸Bitawtoun amisinap, kwapatuls, peinan nuwanaw daGuyaws bisap.

⁹Awoum kuvtokays livan simsimiyas wasigeis. Kukin bukuvtok livan soum, daGuyaws mo bikamtanim yak. Takaleiwag towen igaw wakoukwed nises; nuwanaw bisap.

¹⁰⁻¹¹Sigwey, kuninuways tasiyas palopit, kweiboug nikawes daGuyaws anilivan, abes singay igeg, tage ikaptules-wan. Kukin bukusesus māwan, igaw mo bukumwasaws. Kweiboug Youb māwan, aban singay igeg, tage isesun-wan, Yowbad ikalin nuwan, wankuyeim mo isiwyoub avakaen. Yowbad nuwanen wasigeis yakids singay avakaen.

¹²Sigwey yakamiy, livan towen kuvnases beibwein, awoum kutabdabods; awoum kutabdabods kal yagan waseg, walbalab o watinow; awoum. Magat bukutam, misinaka kulana, “Ee”; magat bukupiyeve,

kulana, “Nag”. Kukin kweitān livan bukusen mo beivag sinap kalbaleb, o Yowbad bikatimop sinap towen.

¹³Kal yak ḡbam igeg, kadiloka kunitoug Yowbad waseg. Kal yak annam ibwein, kadiloka kukwanuwel, kuyakawen Yowbad.

¹⁴Kal yak bukukwatoun, kadiloka kudawes tasiyas mituwāvek tayekelesiys bimeis binitougs silmaṇim, bisenas tagon wāwoum, daGuyaws yagan waseg.

¹⁵Magat bukusimounids waseg Yowbad, o bukunitougs takatoun silmaṇin, daGuyaws mo bikatinob gamag towen, ankatoun mo beibwein. O magat ansinap kalbaleb, daGuyaws biwid, beikous.

¹⁶E, kukwāmats amisinap kalbaleb, kulavewas, kunitougs pines simiyas, mo bukubweins.

Kukin kal tadidumwal binitoug Yowbad waseg, Yowbad mo bitawtoun youd towen silmaṇin.

¹⁷Ilaytiy kweiboug gimgilitoun māwana yakids, itawtoun inanitoug Yowbad waseg vāgan nag beikweis kweis, Yowbad mo isilbwed kweis. Ta-ikweis kweis kweitoun bweilim, kweinim katanok tibukon. Makava kḡlas.

¹⁸Ikous, Ilaytiy mo initoug vayuwein, e, mo ikweis kweis, pwepway ivag anagin.

¹⁹⁻²⁰Sigwey yakamiy, kukin soum tayekelesiy teitan, ansinap bwein, mo bipiyev sinap mounid, wankuyeim mo bukukidumwal, vāgan takalbaleb towen bipiyev sinap yaweid. E, kuninuways, bukukidumwal gamag towen bo bukwatinob kululuwan; nag biyageg; nag. Peinan Yowbad biwid ansinap; e, youd babaw kalbaleb biwid beikous.